

Канон пред Себежской иконой Пресвятой Богородицы «Умиление»

Память празднуем 14 (27) марта

Тропарь, глас 8-й

Взыдем, православнии народи града Опочки, на тучную гору, яко на Фаворскую, в дом Спасителя своего, в честь Боголепного Преображения Его, обильную чудес и стократный клас израстившую, и узрим славу чудес от чудотворного образа Пресвятыя Богоматере Умиления Себежския: яко море пролияся и Евфрат, текий из рая, тако слезы Ея быша, из обою оку пролитыя, о нашедшем гневе Создателя своего за наше согрешение, припадём, каменносердечнии, и возрыдаём, просяще: о Владычице, умоли Сына Своего и Господа нашего сими пресвятыми Своими слезами, да избавит нас от всякаго злаго обстояния, и огненного запаления, и междоусобных брани, от мора и глада, и нашествия иноплемённых в грядущия времена, и, радуящися, со Гавриилом благовестником возопиём Ти: радуйся, Обрадованная, Господь с Тобою.

Канон, глас 6-й

Песнь 1

Ирмос: Волною морскою Скрывшаго древле гонителя мучителя – под землю скрыша спасённых отроцы; но мы, яко отроковицы, Господеви поим, славно бо прославися.

Припев: Пресвятая Богородице, спаси нас.

Приидите верных благочестивая множества, духовно лик совокупльше, Пречистую Матерь Слова Божественными песнями воспоем, зряще Теплую Заступницу, от Пречистаго образа Ея преужасное знамение показующую.

Пресвятая Богородице, спаси нас.

Якоже лествицу высокую, зрим Тя, Дево Всенепорочная, еюже к Небесней высоте восходим, и, Тя Предстательницу и утверждение непобедимое стяжавше, Пречистая, навёт и сетей вражиих избавляемся, да явимся и спасёмся, верою к Тебе притекающи.

Слава: В Рождестве Сына Твоего тли не приемиши, от тления всех нас избави и печали, просвещающи матерним Своим дерзновением, Богородованная.

И ныне: Надежду имуще Тя, Богородительнице, и несумённу веру, града сего народи Тебе, яко забрало, граду положше, Дево Неискусобрачная.

Песнь 3

Ирмос: Тобою, Христе, Небеса утверждаема вся, Слово Божие и Сила, исповедуют славу неизреченну и вседетельныя руки Твоея сотворения, несть бо пресвят, разве Тебе, Господи.

Пресвятая Богородице, спаси нас.

Умилосердися на стадо Своё, Пречистая, и смирение граду Твоему даруй, сопротивных челюсти сокруши и тех до конца немощны покажи.

Пресвятая Богородице, спаси нас.

Общаго Пастыря и Владыку породивши Христа, Дево Неискусобрачная, Тому помолися, настоящего гнева избавитися нам, истиннаго обстояния, Владычице.

Слава: Милостива еси, Владычице, Милостиваго рождши Спаса, виждь озлобление и воздыхание людей Своих, ускори, Пречистая, ущедрити ны.

И ныне: Поют Тя, Богородице, Ангельстии Чины и празднуют патриархи со святители, с ними же тогда и Боголюбивии народи текуще во Святую Твою Церковь, видеша Тя, Царице, за ны, грешныя, молящуюся к Сыну Своему, помилovati град Твой и люди, в нем живущия от Твоего образа предивным знаменем.

Господи, помилуй (трижды) Слава, и ныне:

Седален, глас 8-й

Уже древле лик пророческий проповеда – Дверь Небесную и Неопалимую Купину, Свещник Многосветлый, Златую Кадильницу, Ручку и Жезл, преславно днесь и дивно знамение показа, темже благодарственное пение возсылаем Ти, раби Твои, Богородице, моли Христа Бога нашим согрешением оставление даровати, Тебе бо надежду имамы, раби Твои.

Песнь 4

Ирмос: Удивися Твой разум от мене, услышавшу преславная веления смотрения Твоего, укрепися же возлюблением Твоего схождения, Ты бо моя нищеты не отверглся еси.

Пресвятая Богородице, спаси нас.

Почитающая Тя граждане, Пречистая, и по долгу славящая ограждай от безбожных, Чистая, иноплеменик Ты бо тем еси, Пречистая, богатство неотъемлемо, покров же и держава.

Пресвятая Богородице, спаси нас.

Не может язык и слово человеческое похвалити Тя достойно, от Тебе бо без семени Жизнодавец Бог воплотился, Пречистая, благоизволи.

Слава: Призри, Пречистая, спастися рабом Твоим, поющим Тя, и избави от сопротивных и нашедшаго гнева, Богородительнице.

И ныне: Богатный дар и неотъемлемо сокровище даровала еси граду Твоему, образ Твой, Пречистая и Мати Слова, и сего помощи противных низлагаем.

Песнь 5

Ирмос: Союзом любви свяжем, апостоли, владычествующему всеми себе Христу возложше, красны ноги очищашу, благовествующе всем мир.

Пресвятая Богородице, спаси нас.

Теплая Заступнице к Тебе притекающим и ненадеющимся надеждо, виждь озлобление людей Твоих и подаждь Свою помощь, Пречистая.

Пресвятая Богородице, спаси нас.

Иже Огонь рождши Божественный, Дево, противных, Пречистая, молитвою Твоею – огнем – попали, яко сущи Зиждителя умоляючи, Всепетая.

Слава: Великий преднаписует во пророках Моисей Тя Ковчег, и Трапезу, и Свещник, и Ручку, образне являя воплощение еже от Тебе Вышняго, Мати Дево.

И ныне: Ты богатство неистощимое исцелением источник еси верою притекающим к храму Твоему, идеже пребывает образ Твой, Владычице.

Песнь 6

Ирмос: Ят бысть, но не удержан в персех китовых Иона: Твой бо образ нося, Страдавшаго и погребению давагося, яко от чертога, от зверя изыде. Приглашаше же кустодии: хранящии суетная и ложная, милость сию оставили есте.

Пресвятая Богородице, спаси нас.

Избави языческаго нашествия град Твой, Препетая, и не предаждь до конца погибнути наследию Твоему, Пречистая, но силою Рождшагося из Тебе, Владычице, противных низложи (дважды).

Слава: Многосогрешивших к Тебе, Господи, не презри, но прими мольбу Матере Твоея о нас, Щедре, да не хвалятся сопротивнии, – где есть Бог их? – глаголюще, но да разумют вси, яко Ты, Избавителю, с нами еси.

И ныне: Честную икону Твою радостно сердцем и душою облобызаем, веселящися и теплою верою прикасающися, исцеление почерпаем неоскудно.

Господи, помилуй (трижды). Слава, и ныне:

Кондак, глас 4-й

Притецем, людие, богати и убозии, сирии и вдовицы, старии и юнии, в тихое пристанище, под покров цельбоносного источника Богоматере. Слезы бо, яко реки, источает из обою оку чудотворного образа Себежския о находящем гневе за наша злая согрешения и укрепляет град, егоже возлюбила еси, на сопротивныя, утверждает веру православных христиан и избавляет от всякаго зла молитвами Своими.

Икос

Разрешить тьму моих согрешений, юже во уме моем лежащую, и Твоим мя светом просветит, Дево, яко да возмогу Тебе похвалу принести, Юже Отец восхвалит и Дух Святыи осенит, Сын же и Слово Божие в Нюже вселися нетленно, от Пречистую Твоею боку произыде и с человеки поживе, темже мы, грешнии и недостойнии раби Твои, днесь совершающе священное торжество – знамение, бывшее от честныя иконы Твоея, в немже предивное чудо показала еси, и, Твоему чудеси удивльшися и Твоих богатых даров исполньшися, вместо благовонных аромат, елико возможно нам, земным, похвальная пения приносим Ти, глаголюще: радуйся, радости Ангелом и человеком; радуйся, покрове, и утверждение, и надеждо граду Твоему; радуйся, противных силою Твоею низлагающая; радуйся, Разумнаго Солнца Мати, верных просвещающая, неверных же помрачающая. Радуйся, христианом похвало.

Песнь 7

Ирмос: Неизреченное чудо: в пещи Избавивый преподобныя отроки из пламене во Гробе мертв, бездыханен полагается, во спасение нас, поющих: Избавителю Боже, благословен еси.

Пресвятая Богородице, спаси нас.

Воистинну сокровище честно граду Твоему, икона Твоя, даровася, Пречистая, юже сами зряще, о чудеси удивляемся, Сыну Твоему вопиюще: благословен Бог отец наших.

Пресвятая Богородице, спаси нас.

Во храм Боголепного Преображения, Владычице, притекающе, людие, рuce простирающе, на молитву движем Тя: виждь озлобление наше и подаждь Твою помощь, Богородице.

Слава: Светоносная благодать, исцеление граду Твоему дадеся, образ Твой, Пречистая, егоже любезно облобызающе, веселящися, вопиём: благословен Бог отец наших.

И ныне: Свеща Божественного сияния и Незаходимаго Света явися, свещник, светосияющ и мир весь озаряющ зарею чистаго девства, Тя поющия спасаеши, Благословенная, Яже Бога плотию рождающая.

Песнь 8

Ирмос: Ужаснися, бойся, Небо, и да подвижатся основания земли: се бо в мертвецех вменяется в Вышних Живый и во Гроб мал странноприимается. Егоже, отроцы, благословите, священницы, воспойте, людие, превозносите во вся веки.

Пресвятая Богородице, спаси нас.

Собезначальное Слово Отцу Дева породила Пречистая нетленно, Того моли, Богородительнице, от сопротивных напастей спастися граду Твоему и в нем людем, поющим: Господа воспевайте, дела, и превозносите Его во веки.

Пресвятая Богородице, спаси нас.

Единая сущи Благая, Преподобного Слова умоли прилежно настоящего гнева граду Твоему избавитися, да несумненною верою Сыну Твоему зовем, поюще: дети, благословите, священницы, воспойте, людие, превозносите Его во веки.

Слава: Сопротивных разжжения и пламенновидных стрелы, испущаемии на нас, угаси, Владычице, яко да Тя поем и превозносим, Чистая, во веки.

И ныне: Яко нетленное зеркало, имея во граде Твою чудотворную икону, Пречистая, сопротивляющихся низлагаем и Сыну Твоему вопиём: благословите, вся дела Господня, Господа, пойте и превозносите Его во веки.

Песнь 9

Ирмос: Странствия Владычня и Безсмертныя Трапезы на Горнем месте высокими умы, вернии, приидите, насладимся, возшедша Слова, от Слова научившися, Егоже величаем.

Пресвятая Богородице, спаси нас.

Оком милосердным свыше призри на град и в нем люди Твоя, Пречистая, иныя бо помощи не имамы, токмо Тя, Всенепорочную, темже вси яко Матерь Божию величаем.

Пресвятая Богородице, спаси нас.

Раби Твои, вопиём Ти, Пречистая Мати Божия: обычныя милости Твоя на град и люди милостивно покажи и сопротивных обстояний нас измени, да Тя непрестанно величаем.

Слава: Мысли очистивше и ум, празднлюбнаго града Опочки соборы со священным чином и всех верных благочестивое множество, восхвалите Матерь Слова, яко от Тоя образа бысть предивное знамение, емуже со страхом кланяющися, Тя величаем.

И ныне: Якоже Божественною светлостию озаряему зрим днесь, Пречистая, икону Твою честную ейже кланяющися, Тя величаем.